

Rais: Tabung stabil harga getah masih dikaji



DATUK RAIS YATIM

KUALA LUMPUR, Rabu — Kerajaan sedang menjalankan kajian lanjut mengenai usaha menubuhkan tabung bagi menstabilkan harga getah negara, kata Menteri Kemajuan Tanah dan Wilayah, Datuk Rais Yatim hari ini.

Menurutnya, kajian itu dijalankan oleh agensi-agensi kerajaan di bawah kementeriannya termasuk Risda, Felda dan Felcra dengan kerjasama Kementerian Perusahaan Utama dan Kementerian Kewangan.

Oleh BUSTAMAM AHMAD

Ini boleh disifatkan sebagai langkah terbaru kerajaan ke arah menjaga kepentingan enam juta rakyat sektor pekebun kecil di seluruh negara yang bergantung hidup kepada hasil pengeluaran getah.

Cadangan kerajaan untuk menubuhkan tabung itu mendapat sokongan penuh dari Persatuan Kebangsaan Pekebun-Pekebun Kecil Malaysia (PKPKM) yang mewakili sektor pekebun kecil getah negara.

Datuk Rais baru-baru ini mengumumkan kerajaan sedang

mengkaji kemungkinan menubuhkan tabung itu ketika merasmikan seminar Persatuan Negara-Negara Pengeluar Getah Asli (ANRPC) mengenai kemajuan dan pembangunan pekebun-pekebun kecil di sini.

Beliau memberitahu *Berita Harian*, satu jawatankuasa khas bersama yang ditnggotai oleh agensi dan Kementerian Kemajuan Tanah dan Wilayah akan dibentuk tidak lama lagi untuk menjalankan kajian tersebut.

Katanya, jawatankuasa itu besar ketunggalannya akan dipengerusikan oleh seorang pegawai kanan Felda.

Tabung itu, jelas Datuk Rais akan menjadi 'penyelamat' kepada pekebun-pekebun kecil sewaktu harga getah jatuh.

"Saya telah mengarahkan agensi-agensi kerajaan di bawah kementerian ini untuk menjalankan kajian bersama dengan Kementerian Perusahaan Utama dan Kementerian Kewangan bagi memastikan usaha kita ke arah menjaga kepentingan pekebun kecil mendapat sokongan penuh dari semua pihak.

"Kajian yang teliti ini perlu dijalankan kerana penubuhan tabung ini akan menyentuh aspek undang-undang dan unsur pemberian subsidi oleh kerajaan kepada pekebun-pekebun kecil.

"Saya tidak dapat mengulas dengan lanjut mengenai tugas menyeluruh tabung ini, tetapi tujuan utama penubuhannya ialah untuk membantu pekebun-pekebun kecil kita sewaktu getah asli mengalami kejatuhan harga," jelasnya.

Datuk Rais juga tidak menyebut bila kajian lanjut itu dijangka selesai dijalankan, sekadar berkata beliau berharap dapat mengemukakannya kepada Kabinet bagi mendapatkan kelulusan dengan secepat mungkin.

Bahan asal dari Arkib
Negara Malaysia